

CONVENIO ESPECÍFICO DE COLABORACIÓN ENTRE A VICEPRESIDENCIA PRIMEIRA E CONSELLERÍA DE ECONOMÍA, INDUSTRIA E INNOVACIÓN DA XUNTA DE GALICIA E A UNIVERSIDADE DE VIGO PARA REALIZAR TRABALLOS DE FIN DE ESTUDO (GRAO OU MESTRADO) NO LABORATORIO OFICIAL DE METROLOXÍA DE GALICIA (LOMG).

REÚNENSE:

Dunha parte, _____, Vicepresidente Primeiro e Conselleiro de Economía, Industria e Innovación, en virtude das competencias que lle son recoñecidas polo Decreto 60/2022, do 15 de maio do seu nomeamento, actuando no exercicio do seu cargo e en función das atribucións que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia e o Acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares.

Doutra, _____, reitor da Universidade de Vigo, nomeado segundo o Decreto da Comunidade Autónoma de Galicia 110/2022, do 9 de xuño, publicado no Diario Oficial de Galicia (DOG) núm. 117, do 20 de xuño de 2022, de acordo coas competencias que lle outorga o artigo 20 da Lei orgánica 6/2001, do 21 de decembro, de universidades, e o artigo 29 dos Estatutos da Universidade de Vigo, aprobados polo Decreto 13/2019, do 24 de xaneiro, e publicados no DOG núm. 38, do 22 de febreiro do 2019.

Ambas as partes teñen plena capacidade para levar adiante o presente convenio específico de colaboración e

EXPOÑEN

1. Que o Laboratorio Oficial de Metroloxía de Galicia (en adiante LOMG) está adscrito á Vicepresidencia Primeira e Consellería de Economía, Industria e Innovación, a través da Subdirección Xeral de Administración Industrial, da Secretaría Xeral de Industria; sendo un centro que apoia con carácter horizontal ao tecido industrial en actividades relacionadas coa medida, a través dunha ampla carteira de servizos tecnolóxicos.

2. Que é vontade das partes colaborar na última etapa formativa do estudiantado universitario apoiando a realización dos seus traballos de fin de estudos desenvolto como parte das materias Traballo Fin de Grao (en adiante, TFG) e Traballo Fin de Mestrado (en adiante, TFM).
3. Que TFG ou TFM son materias obrigatorias do plan de estudos dos títulos oficiais de grao ou de mestrado, respectivamente. O seu obxectivo é permitir que o estudiantado desenvolva, aplique e demostre parte dos coñecementos, capacidades e competencias adquiridos ao longo da súa formación académica.
4. Que as materias TFG ou TFM teñen unha carga académica entre 6 e 30 créditos ECTS, se realizan na fase final do plan de estudos e están orientadas a avaliar as competencias incluídas na memoria do título.
5. Que a proposta de elaboración dun TFG ou dun TFM por parte do/a estudante poida estar vinculada ás distintas áreas operativas LOMG.
6. Que o presente convenio ten como obxecto establecer un marco de colaboración entre as partes que apoiem a execución das materias TFG/TFM a través de estancias nas instalacións do LOMG.
7. Que o proxecto desenvolto como parte do TFG ou do TFM ao abeiro do presente convenio realizarase baixo a dirección conxunta e coordinada da universidade e do LOMG, nos termos recollidos tanto nas normativas para elaborar o TFG e o TFM da universidade como nos procedementos e instrucións de aplicación no propio LOMG.
8. Que as estancias no LOMG realizadas ao abeiro deste convenio non terán a consideración e, polo tanto, non se rexerán pola lexislación vixente en materia de prácticas académicas externas.

Polo anteriormente exposto, acordan asinar un convenio específico de colaboración que se rexerá polas seguintes

ESTIPULACIÓNS

Primeira. Obxecto

O obxecto deste convenio é regular a realización por parte do estudiantado da Universidade de Vigo dos traballos de fin de estudos desenvoltos como parte das materias Traballo Fin de Grao e Traballo Fin de Mestrado nas instalacións do Laboratorio Oficial de Metroloxía de Galicia (LOMG), centro adscrito á Secretaría Xeral de Industria da Vicepresidencia Primeira e Consellería de Economía, Industria e Innovación, permitindo que desenvolvan e apliquen parte dos coñecementos, capacidades e competencias adquiridos ao longo da súa formación académica na Universidade de Vigo.

Segunda. Acollemento do estudiantado

Cada TFG/TFM realizado ao abeiro deste convenio requirirá a subscrición dun documento específico (anexo I) no que se formalice a estancia do estudiantado no LOMG e no que se indique a seguinte información:

- Datos do ou da estudante.
- Datos da entidade colaboradora onde se realizaría a estancia.
- Datos dos directores ou directoras do traballo na Universidade de Vigo.
- Datos dos titores ou titoras na entidade colaboradora.
- Datos do traballo.
- Datos da duración e dos horarios da estancia.

A relación entre o estudiantado e o LOMG, ao abeiro do presente convenio, non constitúe un vínculo xurídico ou unha relación laboral de ningún tipo, nin supón unha obriga a unha contraprestación económica para ningunha das partes.

Terceira. Compromisos das partes

A Universidade de Vigo comprométese a:

- Nomear polo menos un director/a do traballo, de conformidade coa normativa

específica que regula a materia, quen deberá colaborar coa persoa designada como titora na entidade colaboradora para que o proxecto chegue a bo termo.

- Establecer co LOMG os obxectivos e a planificación do proxecto con carácter previo ao inicio da estancia.
- Informar o estudiantado participante no desenvolvemento das actuacións previstas neste convenio do seu contido.

O LOMG comprométese a:

- Nomear polo menos un titor/a do traballo, pertencente á entidade, que fará un seguimento do programa do traballo durante a estancia do estudiantado no centro.
- Facilitarlle ao estudiantado os medios e as instalacións oportunas para poder desenvolver o proxecto acordado.
- Orientar e axudar o estudiantado a resolver as súas dúbidas e dificultades.
- Facilitarlle ao estudiantado a tramitación da documentación que se requira para o desenvolvemento, depósito e defensa do seu TFG/TFM.
- Informar a universidade, no seu caso, de que se modifiquen as condicións acordadas no anexo I vinculado a este convenio.

Cuarta. Dereitos e obrigas do estudiantado

- Realizar con dilixencia e con aproveitamento o seu TFG ou TFM nas condicións acordadas no anexo I vinculado a este convenio.
- Comunicarlles aos directores/as e titores/as do TFG ou do TFM calquera incidencia que afecte o seu correcto desenvolvemento.
- Gardar con absoluto rigor o segredo profesional e a confidencialidade respecto da información recollida durante e unha vez terminada a súa estancia no LOMG.
- Coñecer e aceptar as directrices establecidas no LOMG na súa política de

seguridade, ademais da normativa xeral en materia de protección de datos.

- Respetar as normas de funcionamento, seguridade e prevención de riscos laborais indicadas polo LOMG.
- Percibir, de ser o caso, unha contraprestación en concepto de bolsa ou de axuda ao estudo.

Quinta. Proxecto de traballo

O proxecto que desenvolverá o estudiantado no TFG ou no TFM:

- Recollerase no anexo I vinculado a este convenio e deberá fixar o título aproximado e os obxectivos do traballo, así como unha breve descrición e as actividades.
- Deberá gardar relación directa cos contidos adquiridos nos estudos cursados.
- Será independente e estará diferenciado do proxecto formativo que, de ser o caso, se realizou como parte dunhas prácticas externas na mesma entidade colaboradora.
- Deberá desenvolverse dentro dos límites establecidos polo ordenamento xurídico, entre os que destacan os derivados dos compromisos éticos asumidos pola comunidade científica e as normas deontolóxicas.

Sexta. Oferta e demanda de proxectos

A oferta desta tipoloxía de traballos de fin de estudos estará xestionada pola escola ou pola facultade da Universidade de Vigo á que estea adscrita a titulación e o plan de estudos ao que pertenza a materia TFG ou TFM na que estea matriculado o estudiantado interesado na súa realización. Nalgún caso, o LOMG podería propor ofertas de proxectos, os cales se someterían á consideración dos centros docentes (no caso de TFG) ou das comisións académicas de mestrado (no caso de TFM) para valorar a súa idoneidade e entidade académica como traballo de fin de estudos antes de ofertalos.

Sétima. Duración e horario

A duración da estancia no LOMG para apoiar a realización dun traballo de fin de estudos non poderá superar os créditos indicados para a materia na memoria de verificación do título.

O horario de permanencia do ou da estudante no LOMG establecerase de acordo coas características e coa dispoñibilidade do propio centro, e quedarán reflectidas no anexo I vinculado a este convenio.

O réxime de asistencias terá que incluír a regulación que lle permita ao estudiantado cumprir coas súas responsabilidades académicas, formativas e de representación e de participación; e a conciliar, no caso do estudiantado con discapacidade, a realización das estancias coas actividades e situacións persoais derivadas ou conectadas coa súa situación de discapacidade, tras comunicarllo coa antelación suficiente ao LOMG.

Oitava. Autoría e propiedade intelectual

A Propiedade intelectual e industrial asustarase aos termos establecidos na lexislación reguladora da materia.

Novena. Confidencialidade

Os traballos desenvolvidos nas instalacións do LOMG poden conter información que, pola relevancia que teñen para a súa actividade, poden requirir tratalos coa debida confidencialidade. Os directores/as do traballo dun TFG ou dun TFM deberán gardar confidencialidade na súa relación con calquera información coñecida como consecuencia da súa actividade como director/a. Así mesmo, o/a estudante deberá gardar confidencialidade en relación coa información interna do LOMG e segredo profesional sobre as actividades realizadas durante e unha vez finalizada a estancia. De ser o caso, o LOMG pode esixirlles tanto ao director/a coma ao/a estudante a sinatura de acordos específicos de confidencialidade. As medidas que garanten a confidencialidade destes traballos nos actos de desenvolvemento, depósito e defensa quedan reflectidas nun protocolo de confidencialidade para os TFG ou os TFM que se activará tanto por petición

do LOMG coma do ou da estudante, autor/a do traballo.

Décima. Cobertura de seguro

Calquera eventualidade de accidente ou de responsabilidade civil que se producise no tempo de realización do proxecto que se desenvolva como parte do TFG ou do TFM durante a estancia do ou da estudante no LOMG estará cuberta, segundo o caso, polo seguro escolar ou polo seguro de accidentes ou de responsabilidade civil contratados para este fin pola Universidade de Vigo.

No caso de realizar un TFG ou un TFM no estranxeiro e con independencia da modalidade, o estudantado deberá subscribir pola súa conta un seguro de accidentes que inclúa a repatriación e un seguro de responsabilidade civil, e achegaralle unha copia deste ao seu director/a do TFG ou do TFM ao inicio da práctica.

Décimo primeira. Modificación das condicións acordadas no anexo I

Calquera modificación das condicións acordadas no anexo I vinculado ao presente convenio será realizada por unha comisión formada ad hoc por unha persoa en representación do LOMG (distinta á persoa que exerce de titor/a) e pola persoa que coordine a titulación á que pertenza o/a estudante, ou persoa en quen delegue.

Décimo segunda. Vixencia e causas de resolución do convenio

O presente convenio entrará en vigor na data da sinatura e terá unha duración de catro anos. En calquera momento, e antes de finalizar o prazo anterior, as partes poderán acordar de forma expresa a súa prórroga por un período de ata catro anos adicionais.

O presente convenio extinguirase por algunha das seguintes causas:

- Polo transcurso do prazo de vixencia do presente convenio sen acordar a súa prórroga.
- Pola solicitude de denuncia por algunha das partes. Neste caso a parte interesada deberá de comunicarllo por escrito á outra parte con polo menos tres meses de

antelación á data na que pretenda dalo por resolto.

- Por mutuo acordo das partes, mediante o correspondente escrito.
- Polo incumprimento dos compromisos establecidos neste convenio por parte de calquera das partes, previamente manifestado mediante unha comunicación escrita fidedigna e cun prazo de antelación de, polo menos, un mes, pola parte a quen prexudique.
- Por decisión xudicial declaratoria de nulidade do convenio.
- Por calquera outra causa distinta das anteriores prevista nas leis.

En calquera caso, as partes comprométese a finalizar o desenvolvemento das actividades xa iniciadas por un/unha estudante que poida estar realizando unha estancia no LOMG no momento da notificación da denuncia.

Décimo terceira. Protección de datos

As partes manifestan coñecer e cumprir a lexislación europea en materia de protección de datos de carácter persoal, á que se someten de forma expresa e comprométese a darlles un uso debido aos datos de tal natureza que obteñan como consecuencia do desenvolvemento do presente convenio, no marco do disposto polo Regulamento (UE) 2016/679 do Parlamento Europeo e do Consello, do 27 de abril de 2016.

As partes comprométese a:

- Tratar os datos de carácter persoal coa finalidade exclusiva de realizar o servizo.
- Que os datos de carácter persoal non serán obxecto de ningún tratamento distinto aos previstos neste convenio.
- Que os datos de carácter persoal non se lles cederán a terceiros, agás nos casos en que exista unha obriga legal.

As persoas interesadas poderán exercer, no seu caso, os dereitos de acceso, rectificación, cancelación, oposición, limitación e portabilidade nos termos legais previstos, mediante a comunicación ao domicilio social da respectiva entidade.

O LOMG adoptará as medidas adecuadas para limitar o acceso do seu persoal aos datos persoais durante a vixencia deste convenio.

Os datos de carácter persoal destruíranse ou devolvanse, a criterio da Universidade de Vigo, unha vez finalizada a vixencia do convenio e no momento en que, no seu cumprimento das condicións pactadas ou legalmente previstas, termine a relación entre ambas as partes; sen prexuízo das excepcións que a normativa e/ou as decisións xudiciais puidesen establecer con respecto ao mantemento temporal mínimo de certos datos que pola súa natureza así se requira. O mesmo destino daráselle a calquera soporte ou documento no que conste algún dato de carácter persoal obxecto de tratamento.

Décimo cuarta. Publicidade e Rexistro

Os datos básicos relativos a este convenio serán publicados de acordo co previsto no artigo 15 da Lei 1/2016, do 18 de xaneiro, de transparencia e bo goberno, e co Decreto 126/2006, do 20 de xullo, polo que se regula o Rexistro de convenios da Xunta de Galicia.

Décimo quinta. Natureza e xurisdición

As cuestións litixiosas xurdidas con respecto á interpretación, modificación, resolución e efectos do presente convenio serán resoltas, en primeira instancia, pola vicerreitoría competente na organización académica das materias de traballos de fin de estudos. Os conflitos que poidan xurdir por ambas as partes, e que non se poidan resolver internamente, someteranse á resolución da xurisdición contencioso-administrativa, dado o carácter administrativo do convenio.

O presente convenio, de natureza xurídico-administrativa, asínase ao abeiro da Lei 40/2015, do 1 de outubro, de réxime xurídico do sector público.

E, como proba de conformidade, as partes comparecentes asinan o presente convenio en Santiago de Compostela, na data da sinatura electrónica (18.04.2023)

O vicepresidente primeiro e conselleiro de
Economía, Industria e Innovación

O reitor da Universidade de Vigo